

Avenida Papa J uan Pablo II

STA. CRUZ -- Gobierno di Aruba a dicidi cu lo cambia e caya cu ta yama Rondweg den Dakota den e nomber Avenida Papa Juan Pablo II.

E cambio di nomber a origina di un peticion di Parokia San Francisco na Gobierno pa duna e parke chikito dilanti Misa San Francisco e nomber Plaza Papa Juan Pablo II.

Despues cu Gobierno a tuma e decision pa cambia Rondweg pa Avenida Papa Juan Pablo II pastoor Daniel Szpila di Parokia Birgen di Fatima na Dakota instala un comision "Inauguracion Avenida Papa Juan Pablo II" pa traha riba un celebracion pa e ocasion aki. Pasobra no ta tur dia un caya na Aruba ta haya nomber di un Beato tan stima pa henter mundo.

Como lider di proyecto a wordo instala sra Chanin Boekhoudt y como secretaria Sharona Sapuana. E 2 personanan aki tambe lo lidera e comision di Finanzas y Recaudacion di Fondo. Sra Cime Texier y sra Ida Croes lo lidera e comision Liturgia, sr Marlon Sneek y sr Jose Franken lo encabesa e comision Habitantenan di Rondweg, sra Noraida Carolina lo encabesa e comision di Schoolnan di Dakota, sr Steve Netto lo traha den e comision Material di Promocion, e comision tecnico ta cay bao di sr. Sidney Tromp y sr Jose Jabe. Sr. Tito Sapuana lo traha den comision di Relacion Publico (PR). Sra Vanessa Croes lo traha cu su comision riba e programa di dia 22 di October.

E fecha cu a wordo estableci pa e inauguracion di e Avenida ta dialuna 22 October 2012. Esaki ta e fecha cu a Vaticano a apunta como dia di Beato Papa Juan Pablo II durante beatificacion di Papa Juan Pablo II aña pasa riba 1 di Mei 2011.



Tin e intencion pa involvi tur e habitantenan di Rondweg den e actividadnan y tambe e pueblo di Aruba en general cu kier duna nan aporte.

Lo tin un siman completo di actividadnan manera nochi di poesia y teatro, nochi hubentud, nochi di scolnan di Dakota, nochi di parokianonan di Aruba y nochi di cultura cu musica.

Actualmente e comision di habitantenan di Rondweg ta wordo informa di e cambio cu lo tuma luga. Y nan lo haya un pakete di informacion encuanto Papa Juan Pablo II y tambe nan lo haya material pa decora nan cas riba 22 di October.

Riba 22 di October lo tin e desvelo di e Avenida door di Gobierno di Aruba. Monseñor Luis Antonio Secco a confirma su presencia riba e dia aki. E intencion ta cu nos prome ministro, obispo y un un habitante di Rondweg lo hiba palabra. Despues di e desvelo lo sigui cu un procesion cu lo sali for di comienzo di e avenida pabao di Aruba Trading bieu y lo termina na e fin di e avenida pabao di Brenchi bieu. Y aki lo sigui cu un nochi cultural. Tur grupo uniforme, grupo di oracion, hobennan, grupo deportivo cultural cu ta desea di participa den e procesion ta bonbini.

Durante di e inauguracion lo toca e himno di Aruba, himno di Vaticano y Himno di Beatificacion dia papa Juan Pablo II cu lo wordo canta na papiamento. Y ta bao di encargo di sra Maybeline Arends-Croes. Mientras cu e e procesion

ta pasa den avenida e Letania di Papa Juan Pablo II lo wordo canta na papiamento pa tur hende. Sr Robert Jeandor tin e encargo pa composita y aregla e musica di e letania riba un ritmo caribense.

Tur hende na Aruba cu kier aporta sea cu arte, musica, material y zontribucion financiero ta bonbini.

Henter pueblo di Aruba ta invita pa participa na e acto di inauguracion aki.

Lo cuminsa tin un triduo riba e dianan 18, 19 y 20 di October. Y riba diadomingo 21 di October pa 6ór di atardi lo tin un Santo Sacrificio di Misa pa reza pa canoninacion di Papa Juan Pablo II.

Y manera tur hende sabi cada celebracion tin su gastonan y pa e motibo aki lo organiza diferente actividad pa recauda fondo pa e realiza e celebracion aki.

E prome actividad di recaudacion lo ta diabierna 7 di September pa 8ór den Cas di Cultura. Unda lo pasa un pelicula riba bida di papa Juan Pablo II. Entrada pa e pelicula lo ta Afl 15,00. Tambe lo tin un t-shirt di Papa Juan Pablo II na benta desde dialuna 30 di Juli 2012 na Parokia Birgen di Fatima.

Rosario Bibo diarazon 1 di Augustus na Alto Vista

Diarazon 1 di Augustus lo tin un otro Rosario Bibo na Kapel di Alto Vista cuminsando pa 7'or y mey di anochi.

Na e ocasion aki lo reza pa tur e hobennan cu ta bayendo pa studia den exterior y tambe pa tur cu ta bay cuminsa e aña escolar nobo.

Lo pidi Birgen di Alto Vista tambe pa yuda tur e mayornan y e maestronan pa nan por guia e hobennan, chikito y grandi durante nan estudio.

Cada persona tin su propio responsabilidad pa traha y studia pa logra algo den bida, pero combina cu oracion e motivacion y e logronan lo por ta mas grandi.

Pues diarazon 1 di Augustus, otro Rosario Bibo na Alto Vista